

楚宝卷

楚寶卷第三十九

明湘潭周聖楷伯孔輯纂

山水

太嶽武當山

武當山在襄陽府均州南

水經注云武當山一曰太和山亦曰參上又曰仙室荆

州圖副記曰山形特秀異于衆嶽峯首狀博山香鑪亭

亭遠出藥食延年者萃焉晉咸和中歷陽謝允棄羅邑

宰隱遁斯山故亦曰謝羅山曾水發源山麓逕越山陰

東北流注于沔

名山記曰武當山區域周迴四五百里中央有一峯名曰參嶺高二十餘里望之秀絕出于雲表清朗之日然後見峯一月之閒不見四五輕霄蓋其上白雲帶其前旦必西行夕而東返俗謂之朝山蓋以衆山朝揖之所生也

聖楷按永樂十六年十二月勅修武當山宮觀成賜名曰太嶽太和之山御製碑文紀其事甚詳於戲山之靈跡顯晦如此古人題詠既不可見而近日作遊記者又輒多庸淺豈文士筆墨亦爲金銀宮闕之氣所奪耶東橋伯玉元美三先生記文雖不甚佳然而眺聽老成欣

慨交至睠懷宣室猶有足感者特錄元美一歌于後云
黑帝不臥元冥宮再佐真人燕薊中乾坤道盡出壬午
日月重朗開屯蒙人閒大小七十戰一勝業已歸神功
久從北極受尊號卻向西方稱寓公武當萬古鬱未吐
得吐居然壓華嵩是時豈獨疲荆襄雍豫梁益皆爲忙
少府如流下白撰蜀江截雲排豫章太和絕頂化城似
玉虛彷彿秦阿房南巖宏奇紫霞麗甘泉九成差可當
十年二百萬人力一一捨置空山傍嗚呼英雄御世故
多術卜鬼探符皆恍惚不聞成祖帝王須曾借元天師
相髮漢武空邀王母過高宗不顯宋宣和功名雖盛毋

乃晚混沌時來當奈何

習家池

習家池在襄陽府東白馬山下

水經注云襄陽侯習郁魚池郁依范蠡養魚法作大陂
陂長六十步廣四十步池中起釣臺池北亭郁墓所在
也列植松篁于池側沔水上郁所居也又作石伏逗引
大池水于宅北作小魚池池長七十步廣二十步西枕
大道東北二邊限以高隄楸竹夾植蓮芡覆水是游宴
之名處也山季倫之鎮襄陽每臨北池未嘗不大醉而
還恒言此是我高陽池故時人爲之歌曰山公出何去

往至高陽池日暮倒載歸酩酊無所知

聖楷按晉永樂三年山簡出爲征南將軍都督荆湘交
廣四州諸軍事假節鎮襄陽于時四方寇亂天下分崩
王威不振朝野危懼簡優游卒歲唯酒是耽諸習氏荆
土豪族有佳園池簡每出游嬉多之池上置酒輒醉名
之曰高陽池時有兒童歌曰山公出何許往至高陽池
日夕倒載歸酩酊無所知時時能騎馬倒著白接羅舉
鞭向葛彊何如并州兒彊家在并州簡愛將也夫以簡
之任重憂大如此而酣飲廢時坐待傾覆事雖韻吾所
不取

漢水 原文

漢水源出隴西嶓冢山由漢中流經鄖縣均州光化至襄陽城北又東南經宜城縣抵安陸州至大別山入江

宋之問漢江宴別曰漢廣不分天舟移杳若仙秋虹映晚日江鶴弄晴煙積水浮冠蓋遙風逐管絃嬉遊不可極畱恨此山川

王維江漢臨汎曰楚塞三湘接荆門九派通江流天地外山色有無中郡邑浮前浦波瀾動遠空襄陽好風日畱醉與山翁

聖楷曰畱恨畱醉俱妙覺鹿門峴山諸人去人不遠

三峽

三峽在歸州巴東縣境爲入蜀之險阻

水經注云江水又東逕廣谿峽斯乃三峽之首也其間三十里頽巖倚木厥勢殆交北岸山上有神淵淵北有白鹽崖高可千餘丈俯臨神淵土人見其高白故因名之天旱然木岸上堆其灰燼下穢淵中尋則降雨此峽多猿不生北岸蓋自昔禹鑿以通江郭景純所謂巴東之峽夏后疏鑿者江水又東逕巫縣故城南又東逕巫峽此杜宇所鑿以通江水也郭仲產云按地里志巫山在縣西南而今縣東有巫山將郡縣居治無恒故也江

水歷峽東逕新崩灘此山漢和帝永元十三年崩晉太
元二年又崩當崩之日水逆流百餘里湧起數十丈今
灘上有石或圓如簞或方似屋若此者甚衆皆崩崖所
隕致怒湍流故謂之新崩灘其頽巖所餘比之諸嶺尙
爲竦桀其下十餘里有太巫山非惟三峽所無乃當抗
峯岷峨偕嶺衡疑其翼附羣山並縈青雲更就霄漢辨
其優劣耳神血涂所處山海經曰夏后啓之臣血涂是
司神于巴巴人訟于血涂之所其衣有血者執之又帝
女居焉天帝之季女名曰瑤姬未行而亾封于巫山之
臺精魂爲草實爲靈芝宋玉所謂巫山之女高唐之姬

且爲行雲暮爲行雨朝朝暮暮陽臺之下旦朝視之如
言故爲立廟號曰朝雲其閒首尾一百六十里謂之巫
峽蓋因山爲名也自三峽七百里中兩岸連山略無闕
處重巖疊嶂隱天蔽日自非停午夜分不見曦月至子
夏水襄陵沿沂阻絕王命急宣有時朝發白帝暮到江
陵其閒千二百里雖乘奔御風不以疾也春冬之時則
素湍淥潭迴清倒影絕巘多生檉柏懸泉瀑布飛漱其
閒清榮峻茂良多趣味每至晴初霜旦林寒澗肅常有
高猿長嘯屢引淒異空谷傳響哀轉久絕故漁者歌曰
巴東三峽巫峽長猿鳴三聲淚沾裳江水又東逕石門

灘又東過姊歸縣之南又東過夷陵縣南江水自建平

卽姊歸

至東界峽盛宏之謂空冷峽峽甚高峻卽空都建

平二郡界也其閒遠望交嶺表有五六峯參差互出上有奇石如二人像攘袂相對俗傳兩郡督郵爭界于此空都督郵歟勢小東傾議者以爲不如也江水歷峽東逕岷昌縣之鈔竈下絕岸壁立數百丈有一火燼鋪在崖閒望見可長數尺父老傳言昔洪水之時人薄舟崖側以餘燼鋪之至今猶存故先民相承謂之鋪竈也又東流頭灘其水並浚激奔暴魚鱉所不能遊行者嘗苦之其歌曰灘頭白勃堅相持倏忽淪沒別無期又東逕

狼尾灘而歷人灘袁松曰二灘相去二里人灘水至峻
峭南岸有青石夏沒冬出其石欹崆數十步中悉作人
面形或大或小其分明者鬚髮皆具因名曰人灘也江
水又東逕黃牛山下有灘名曰黃牛灘南岸重嶺疊起
最外高崖間有色如人負刀牽牛人黑牛黃成就分明
旣人跡所絕莫得究焉此巖旣高加江湍紆迴雖途逕
信宿猶望見此物故行者謠曰朝發黃牛暮宿黃牛言
水路行深迴望如一矣又東逕西陵峽宐都記曰自黃
牛灘東入西陵界至峽口一百里許山水紆曲而兩岸
高山重嶂非日中夜半不見日月絕壁或千許丈其石

彩色形容多所像類林木高茂略盡冬春猿鳴至清山谷傳響泠泠不絕所謂三峽此其一也崧言嘗聞峽中水疾書記及口傳悉以臨懼相戒曾無稱有山水之美也及余來踐躋此意旣至欣然始信之耳聞不如親見矣其疊嶂秀峯奇構異形固難以辭敘林木蕭森離離蔚蔚乃在霞氣之表仰矚俯映彌習彌佳流連信宿不覺忘返目所履歷未嘗有也旣自欣得此奇觀山水有靈亦當驚知已于千古矣

聖楷曰世稱瞿唐峽巫峽歸峽爲三峽者誤也水經注明以廣谿峽爲三峽之首以西陵峽爲三峽之一則三

峽當從廣谿巫峽西陵爲確人又皆以三峽爲蜀地之險不知此乃入蜀之險非蜀地也其地皆在楚境歸州巴東縣原屬巫縣地今巴東縣西九十里卽巫山縣界故巫峽半在巴東惟廣谿峽與瞿唐相連然在春秋時亦屬楚也

三遊洞

三遊洞在宜昌府

唐爲峽州

白樂天序云平淮西之明年冬予自江州司馬授忠州刺史微之自通州司馬授虢州長史又明年春各祇命之郡與知退偕行三月十日參會於夷陵翼日爲之返

棹送予至下牢戍又翼日將別未忍引舟上下者久之
酒酣聞石閒泉聲因捨棹進策步入駛岸初見石如疊
如削其怪者如引臂如垂幢次見泉如瀉如灑其怪者
如懸練如不絕縑遂相與維舟巖下率僕夫芟蕪刈翳
梯危縑滑休而復上者凡四焉仰睇俯察絕無人迹但
水石相薄嶙嶙鑿鑿跳珠濺玉驚動耳目自未訖戍愛
不能去俄而峽山昏黑雲破月出光氣含吐互相明滅
晶熒玲瓏象生其中雖有敏口不能名狀旣而通夕不
寐迨旦將去憐奇惜別且歎且言知退曰斯境勝絕天
地閒其有幾乎如之何俯通津縣歲代寂寥委置罕有

到者予曰借此喻彼可爲長太息豈獨是哉豈獨是哉
微之曰誠哉是言矧吾人難相逢斯境不易得今兩偶
於是得無述乎請各賦古調詩二十韻書于石壁仍命
予序而紀之又以吾三人始遊故因爲三遊洞洞在峽
州上二十里北峯下兩崖相厥閒欲將來好事者知故
備書其事

歐陽修三遊洞詩曰漾檝泝晴川捨舟緣翠嶺探奇冒
層嶮因以窮人境弄舟終日愛春山徒見青蒼杳藹閒
誰知一室煙霞裏乳竇雲腴疑石髓蒼崖一徑橫查渡
翠壁千尋當戶起昔人心賞爲誰畱人云山阿跡更幽